

Javnim novcem gradit će se put do kuće dogradonačelnika Brčkog

Vlada Brčko distrikta odlučna je u namjeri da se budžetskim novcem napravi put do roditeljske kuće dogradonačelnika Ante Domića iz Hrvatske demokratske zajednice Bosne i Hercegovine (HDZBiH). Upravo na prijedlog Vlade Skupština Brčko distrikta je na posljednjoj sjednici, održanoj krajem oktobra 2021. godine, proglasila izgradnju ovog puta javnim interesom. Ista takva odluka iz 2018. godine je poništena na Apelacionom sudu Brčko distrikta.

Riječ je o putu u Podarevcu u Mjesnoj zajednici Skakava Gornja. Priča o izgradnji je počela 2015. godine kada je Domić, tadašnji gradonačelnik, predložio da se za to u budžetu planira 15.000 maraka. Na taj način je pokrenuta procedura koja je podrazumijevala i postupak eksproprijacije privatnog zemljišta na trasi puta.

Obzirom da vlasnik privatne parcele Filip Domić nije bio saglasan, on je pokrenuo postupak na Apelacionom sudu koji je u oktobru 2020. godine poništio Odluku Skupštine o utvrđenom javnom interesu.

Centar za istraživačko novinarstvo (CIN) je pisao o eksproprijaciji privatnog zemljišta kojom bi se izgradili pristupni putevi do kuća političara i glasača u Brčko distriktu.

„Javni interes“ u službi političara

Ipak, sudska odluka nije zaustavila postupak. Kako ga je vratila na početak, odluka o javnom interesu je opet došla na Skupštinu.

Pet poslanika s kojim su novinari CIN-a razgovarali prije glasanja rekli su da ne znaju gdje se put nalazi niti da je Apelacioni sud poništio raniju odluku o javnom interesu. Ina Pamukčić, zastupnica iz Saveza za bolju budućnost, ponukana CIN-ovom pričom zatražila je više informacija o tom putu, ali odgovore nije dobila.

Gradonačelnik Esed Kadrić iz Stranke demokratske akcije je odbio razgovarati sa novinarima. Međutim, za skupštinskom govornicom je rekao da je riječ o odluci sličnoj hiljadama drugih odluka koje su za različite puteve i ranije donesene u Skupštini.

„Te senzacije, naručivanja neka i tako dalje, pustite to kraju. Budite malo odgovorniji i ozbiljniji“, rekao je Kadrić i pozvao zastupnike da glasaju kako žele, bez pritiska da ih neko snima, aludirajući na novinare CIN-a koji su pratili skupštinsku raspravu.

„Ako je samo problem u ovoj državi jedan put u jednoj mjesnoj zajednici, pa kojim putem hoda onaj koji snima ovo trenutno i koji, ne znam ni ja šta?! Treba kaldrmom svi da hodaju?! Jesmo li svi jednaki u zajednici, imamo li pravo svi na komunalnu i cestovnu infrastrukturu? Šta je problem?“, pitao je Kadrić zastupnike.

Iako je Abdulah Iljazović, zastupnik Naroda i pravde, pitao gradonačelnika da li je vlasnik parcele saglasan sa eksproprijacijom, nije dobio odgovor već je dopredsjedavajući Skupštine Ivo Filipović iz HDZ-a BiH tražio da se o tome odmah glasa.

Većina prisutnih zastupnika, njih 16, glasali su za javni interes izgradnje ovog puta, bez postavljanja dodatnih pitanja. Zastupnici Iljazović i Pamukčić bili su suzdržani.

Prema Zakonu o eksproprijaciji nekretnina u Brčko distriktu, privatno zemljište se oduzima vlasnicima nakon što Skupština, na prijedlog Vlade, donese odluku da je gradnja u javnom

interesu. Pritom Zakon nije obavezao institucije da obrazlože razloge za takvu odluku niti je građanima dozvoljeno da se žale na nju. Uz to, nije propisano ni da vlasnik mora dati saglasnost za eksproprijaciju.

„Evo, sada je takva situacija da se ja lično zamjerim nekom političaru. On ako ima skupštinsku većinu, on bez ikakvih problema može da kaže – tvoja advokatska kancelarija ili tvoj stan – evo, to je javni interes, da se eksploatiše i Skupština donosi odluku o javnom interesu (...) i to je sada Distriktovo”, kaže advokat Darko Milićević.